

venis flavis macula fusca apices areolarum spatiumque infra eos usque in marginis exterioris medium occupante et antice maculam albam ad apicem cunei terminante signata. Pectus et abdomen flava, illud pallidum, hoc saturatius coloratum. Pedes colore corporis, subtilissime pallide pubescentes, femoribus posticis sat longis et fortius incrassatis (♀), apicem versus atomis nonnullis obsoletibus fuscis conspurcatis, subtus juxta marginem anteriorem serie macularum fuscescentium signatis; tibiis spinulis subtilioribus concoloribus vel testaceis armatis, tarsorum articulo tertio apice ungviculisque fusco-nigris.

3. *Macrocoleus Bolivari* REUT.

Tab. I, fig. 3, d.

Diagnosis: Flavus aut aurantiacus, subtus cum antennis et pedibus subtilissime pallido-pubescentis, supra glaber (an pilae detritae?); gula setis pallidis instructa; coxis anticis margine pallido-setoso; pedibus omnino innotatis, tibiis spinulis sat longis et robustis nigris, tibiis intermediis adhuc spinulis nonnullis gracilioribus pallidis; hemelytris unicoloribus, membrana dilute fumata, venis aurantiacis; capite latitudini basali aequae longo (♂) vel hac circiter $\frac{1}{4}$ longiore (♀), angulo faciali valde acuto, clypeo tantum leviter arcuato; rostro medium ventris attingente (♀) vel paullo superante (♂). Long. ♂ 5, ♀ $4\frac{1}{3}$ — $4\frac{1}{2}$ mm.

Hab. in Hispania!, D. Dr BOLIVAR.

Descr.: *M. aurantiaco* FIEB. maxime similis, differt tamen structura capitis magis producti et longioris tibiarumque spinulis longioribus. A *M. naso* REUT. divergit rostro brevior, capite minus longe producto, colore etc. Corpus oblongum (♂) vel ovatum (♀), flavum (♂) vel aurantiacum, subtus pallidius (♀), supra glabrum (an pilae in exemplis descriptis divulsae?), subtus pallide flavo-pubescentis. Caput leviter nutans, latitudine basali pronoti fere duplo (♂) vel circiter $\frac{3}{7}$ — $\frac{2}{5}$ (♀) angustius, apicem versus longe productum, pronoto longitudine circiter aequale, latitudini basali longitudine aequale vel hac fere $\frac{1}{4}$ longius, a latere visum altitudine circiter $\frac{2}{5}$ vel fere dimidio longius, clypeo leviter arcuato, angulo faciali valde acuto, gula capite circiter triplo (♂) vel tantum fere duplo (♀) brevior, setis pallidis instructa; vertice oculo paullo magis quam duplo (♂) vel duplo et dimidio (♀) latiore. Oculi fusci, feminae brevius, maris sat longe in genas extensi, orbita interiore recta (♀) vel apicem versus late sinuata (♂). Rostrum medium ventris attingens (♀) vel paullo superans (♂), colore corporis, articulo tertio apicem versus quartoque toto fusco-piceis. Antennae colore corporis subtilissime pallido-pubescentes, articulo primo apicem clypei attingente; secundo latitudini pronoti basali longitudine sub-aequali, maris crassiusculo, duobus ultimis simul sumtis secundo vix longioribus. Pronotum apice longitudine vix (♀) vel fere paullo (♂) angustius, latitudine basis fere $\frac{1}{3}$ brevius, lateribus rectis, unicoloriter flavum vel aurantiacum, pilis brevibus sparsis flavis. Scutellum unicoloriter flavum vel aurantiacum. Hemelytra aequaliter flava vel